

48

*Q. F. F. Q. S.*

# ICH TH Y O- THEOLOGIÆ PRIMÆ LINEÆ,

QUAS

*Cum Consensu Ampliss. Facult. Philos. in Reg.  
Acad. Aboënsi,*

PRÆSIDE

**DN. CAROLO FRID.  
MENNANDER,**

Scient. Natur. PROFESS. Reg. & Ordin.  
PASTORE in Rändämäki, nec non  
Reg. Acad. Scient. Svec.  
MEMBRO,

*Ad publicum exāmen defert*

**NICOLAUS MALM, Jac. Fil.**

*AUSTRO-FINLANDIUS.*

In Auditorio Maj. V. D. die ~~20~~ Maii,  
Ann. MDCCLI.

*H. A. M. S.*

---

ABOÆ, Imprim. Direct. Reg. Acad. Aboëns. Officin.  
JACOB MERCKELL.

VIRO admodum Reverendo atque Praeclarissimo,  
**DN. NICOLAO  
MALM,**

PASTORI in Achas longe meritissimo, & adjacentis  
districtus PRÆPOSITO gravissimo,

Patruo suo ut unico, ita quavis animi veneratione  
semper colendo.

**Q**uod dissertationem banc, omni prorsus eruditio[n]is nitore  
& eloquentie orname[n]to destituta, Nomi[n]i Tuo,  
Patrue carissime, consecrare audeo, illius certe rei e-  
longinquo non indagande sunt rationes. Sangvinis enim arctis-  
sum vinculum, quo Tibi conjungor, & favoris benignitatique  
Tuæ in me plurima documenta, banc qualcumque pii affe-  
ctus testificationem exposcunt. Quamvis enim in beneficiis  
Tuis compensandis, vel saltem depraedicandis, nutui & inten-  
tioni mee non sufficient vires, ingratia tamen nota mibi inure-  
retur, si hac occasione debiti mei plane immemor essem. Suscipe  
ergo, Patrue carissime, tenues & rudes has pagellas, in  
teſſeram grata & venerabunde mentis, eadem benignitate, ea-  
demque serena fronte, qua earundem auctorem semper amplecti  
soles. Summum Numen pii fatigabo precibus, ut Te diu so-  
spitem & salutem conservare dignetur.

ADMOD. REV. ET PRÆCLARISS. NOMINIS TUI

cultor humillimus,  
NICOLAUS MALM.

VIRO Amplissimo atque Experientissimo,  
**D<sup>N</sup>. M A G N O  
LINDER,**

In Ducatu Finlandiae rei metallicæ PRÆFECTO,  
FAUTORI & PATRONO jugiter colendo.

**I**gnoscas mibi, Vir Amplissime, quod rudem & incomitam  
banc opellam Tuo ornaverim Nomine. Factum certe  
id est non ex more apud literatos recepto, quin potius ex  
debito, quo me ob favoris Tui plane singularis in me docu-  
menta, Tibi protixe obstrictum esse sentio. Optarem quidem,  
ut Tibi, que Tua equare possent beneficia, referre valerem.  
Sed quoniam me tantis imparem sentio, neque tenuitas mea a-  
nimi pietatem declarandi aptiorem aliam occasionem sperare me  
sinit, primitias has studiorum Tibi sacras facio. Quas ut  
benigno excipias vultu, meque in posterum favore Tuo frui  
patiaris, ea qua par est animi observantia rogo. Pro perenni  
Tua incolumentate & flore, calidissima fundere vota non ero  
intermissurus.

**AMPLISSIMI NOMINIS TUI**

HIC LOQUA MALM

cultor humillimus,  
NICOLAUS MALM.

VIRO plurimum Reverendo atque P̄eclarissimo,  
**DN. JACOBO MALM,**  
PASTORI in Vichtis & Pyhäjärvi meritissimo,  
PARENTI summa animi veneratione æternum colendo.

**T**uorum in me meritorum, Parens venerande, magnitudinem, curarum gravitatem & impensarum multitudinem, dum mente revolvo, a pietate filiali, qua Te prosequor, & dum vivam sum prosecuturus, alienissimum fore deprehendo, hac data qualicunq; occasione, publice bonitatem Tuam non collaudare. Obveniunt mibi beneficia, sed metam eloquentie mee transgredientia, imo, in quorum recordatione plane obmutesco. Stupet animus, sed juxta quoq; delectatur, dum hæc cogitat. Verum præstat illa silentio involvere, quam jejuna oratione obfuscare. Cum autem nihil habeam, quo tantorum in me meritorum magnitudinem equare queam, hunc rudit & immaturi ingenii juvenilis fœtum, in quo vestigia sapientie & bonitatis Divinae ex sana piscium consideratione fluentia colligere mecum constitui, in tesseram grata & venerabunde mentis, summa animi pietate offero. Suscipe, humillimus rogo, ea qua semper soles fronte placida & benigna, immaturas has immature etatis lucubrations. Excipe quoq; illas ut specimen Tuæ in me indulgentia, meaq; in Te pietatis. Tibi & Tuæ liberalitati illas totas debo, merito ergo illud ipsum, quod Tuum est, ad Te revertitur. Si DEUS Tibi vitam & vires, quæ summa votorum est, mibiq; gratiam clementissime largitus fuerit, maturerentibus annis, matuorem studiorum meorum fructum Tibi offerre conabor. Interim ex piscibus meis Cytbarum potissimum Athenæi, qui babere dicitur καρδια λευκη και πλατεια, perpetue meæ in Te venerationis symbolum, humillime Tibi exhibeo.

CARISSIMI PARENTIS

obedientissimus filius;  
**NICOLAUS MALM.**



I. N. J.

## Praeludium.

**G**lobum huncce, quem incolimus, terraqueum; infinita summi ejus conditoris attributa clarissime exhibere, unicuique patet, qui ejus tam naturam ac compositionem artificiosissimam, quam ejus partium, quæ sunt numeri non tantum stupendi, ac admirandæ varietatis, verum etiam manifestæ aliquando contrarietatis, ad unum tamen eundemque finem tendentiam, amicissimum nemulum, & mutuam harmoniam, oculo paulo attentiori perlustraverit. Occurrunt namque in admirabili hoc naturæ theatro, pio & diligenti rerum naturalium scrutatori, ubique magnalia divina, non tantum in terra, sed etiam in aquis; quæ, quo intimius & accuratius considerantur, eo magis in conditoris sui admiracionem rapiunt mortales. Dum porro oculos nostros convertimus ad res animatas, excellentem earum rimamur compositionis modum & pulchritudinem, reliqua quoque, quæ spectanda nobis exhibent, optimis animalium nostrum pascere possumus deliciis. Omnia namque animalia, a maximo ad minimum, informant nos; lingvam habent, qua nos alloqvuntur; intentiones & fines eorum revealant nobis voluntatem creatoris; com-

A

positio

positio & indoles eorum est vox ad nos , non submissa  
loquens , sed quam fieri potest altum clamans , officia  
sua nobis offerens , nostraque nobis in memoriam re-  
vocans . Quæ omnia vitam nostram jucundorem red-  
dunt , & venerabundum erga summum Creatorem , qui  
hæc omnia tam pulchre ordinavit , in nobis excitant ,  
saltim excitare debent , affectum . Neutquam enim is-  
tantam , in creandis his animalibus , adhibuit sapientiam ,  
ut fastuoso ea pertranseamus supercilios ; sed ut mira cor-  
poris eorum structura , œconomia , diversa vivendi &  
propagandi genera , a nobis probe considerarentur ,  
summaisque divinæ sapientiæ potentia & bonitatis ad-  
mirationem excitarent . Quam male itaque sibi consu-  
lunt illi , qui , repugnante natura , & remordente conscie-  
tia , radios divinæ majestatis splendida corruscantes lu-  
ce , malitiæ suæ nebulis obumbrare cupiunt ; & hæc  
omnia ex accidenti ortum suum duxisse tradunt . Nec  
acculpa vacui illi sunt censendi , qui in magnalibus hisce  
divinis perpendendis justo sunt negligentiores . Incum-  
bit enim unicuique librum scrutari naturæ , cuius assidua  
lectione auctorem ejus cognoscere , resque naturales in  
usum nostrum convertere discimus . Neque quemquam  
difficultas rei deterreat ; est enim lingua , qua conscri-  
ptus est , universalis , ut ab omnibus sine impedimento  
intelligi queat . Quo autem plus temporis huic studio  
impendimus , eo majori rerum naturalium cognoscen-  
darum inflammamur desiderio ; eo etiam magis vene-  
ratio erga DEum , ejusque perfectiones celebrandi &  
dilatandi affectus , in nobis adaugetur . Nimis proli-  
xum utique foret , omnia recensere commoda , quæ  
ex

ex pia rerum naturalium contemplatione, in nos redundant, actumque ageremus opus; cum hæc a viris maxime inclytis, qui in finibus rerum naturalium scrutandis, hoc potissimum seculo, diligentiam collocaverunt, sint exposita & inculcata. Prodiisse enim iam novimus, & maxima cum voluptate teri manibus, non Physico-Theologias modo, sed etiam astro-pyro-bronto-hydrotheologias &c. Nec in animali regno sedulitatem suam desiderari possunt, ubi Insecto-Testaceo theologias &c. possidemus. Cum vero neminem videbam, qui, singulari opera, Ichthyo-Theologiam expuerit, quamvis fatear, apud generales Physico-Theologos varia huc spectantia reperiri, ea ipsa colligere constitui, & præsentibus pagellis agere de piscium admiranda corporis structura, natatione, cœconomia, propagationis modo, reliquisque undivagi hujus generis affectionibus, atque in his divinæ sapientiæ, potentia & bonitatis vestigia pie venerari. Dum vero pisces tibi l. b. pro cœna philosophica offero, fateri mox cogor, illos mea culpa non esse probe conditos; vires enim ingenii nobilissimo huic argumento non respondere animadverto. Te itaque impensè rogo, ut conamina hæc nostra juvenilia censuram tuam experiantur mitiorem.

## §. I.

**A**ntequam vero pisces aquis extrahimus & in scenam producimus, paucis tantum verbis, considerare lubet ipsum elementum aqueum, quod inhabitant. Cujus stupenda non tantum vastitate & profunditate, verum etiam, secundum climata mira &

rite proportionata divisione, ineffabilique, quam hominibus præstat utilitate, summus rerum arbiter potentiam & sapientiam suam quam maxime mortalibus ob oculos posuit. Voluit tamen, ut benignitas ejus eo magis fieret conspicua, tam vastum spatium, quod plus quam dimidium superficie orbis occupare creditur, non esse vacuum & incolis destitutum; sed ibi novum quasi mundum nobis patefecit, illudque inhospitum elementum, ut vegetabilia plurima ibi provenientia taceant, adeo multis quadrupedum, aliorumque animalium speciebus replevit, ut disceptarint veteres: terrestresne an aquatiles plures essent, quæ lis adhuc pendet sub judice; utque haud pauci fuerint in illa opinione, nullum existere animal terrestre, cuius in aquis non esset analogum. Inletorum, vermium, zoophytorum testaceorumque cernuntur ibi stupenda non modo agmina, sed etiam innumeræ multitudinis & varietatis pisces, quos tam pulchellos fecit Creator, tam jucunda colorum varietate depinxit, adeo miris instruxit proprietatibus, tot usibus, tantaque carnis salubritate, eorum haud paucos prædidit; ut ad eos, tanquam ad exquisitissimas quasdam delicias, quibus commode utimur, quibusque multæ hominum myriades sustentantur, invitaremur. Id tamen maximopere admirationem parit, quod in elemento hocce, ad respirationem, primo intuitu, minime idoneo, in quo terrestria animalia, ne dimidium quidem unius horæ, vitam sustinere possunt, reperiantur tot animalia, quæ ibi accrescunt, propagantur, reliquasque vitales & animales commode exercent actiones; quodque aqua necessitatibus eorum tam sit idonea, & ita accommoda-

modata, quam est terra & aér animalibus in iisdem vi-  
ventibus. Si certe in re aliqua alia, utique heic con-  
spicua est summi Creatoris sapientia, quæ pīscibus tam  
miram & a reliquis animalibus abludentem indidit na-  
turam, ut in elemento hoc frigidiori & densiori vitam  
sustinere possint. Idem sapientissimus Conditor, qui il-  
lad corporis nostri aërisque illi inclusi, cum externo  
constituit æquilibrium, ut, quamvis quolibet momen-  
to a cylindro aëreo nobis incumbente prematur, vi  
pondus 20000. librarum exsuperante (a), nihil tamen  
inde incommodi sentiamus; pīscium quoque corpora  
sic formavit, ut, licet præter aëris pressionem, colu-  
mnæ etiam aqueæ gravitationi, quam aquam octogin-  
tesies ad minimum graviorem aëre novimus, sint sub-  
iecti, non tamen inde opprimantur, sed libere moveri &  
munia omnia exercere facilime possint.

## §. II.

**P**īsces, animalia illa apoda, pīnnis instrūcta; quinto  
creationis die fuisse productos, sacra testatur pa-  
gina, ubi sub reptiliū nomine comprehenduntur,  
cum sit natatio reptationis quasi species, cumque hi, fle-  
xuoso corporum impulsu, ita aquis utantur, ut reptantia  
terra. Jubentur vero ibi aquæ non simpliciter producere,  
sed abunde progignere natilia animalia; non tamen ter-  
renum excluditur elementum, quin illud etiam suam  
portionem, ad eorum constructionem contulerit. Sunt  
quoque, qui his verbis aquam tantum constitui pīscibus  
domicilium, & locum nativum, volunt, mediumque  
vitæ eorum conveniens. An vero Adamus nomina pi-  
scibus

(a) B. Nieuventyt, XXIII. Betrachtung, p.m. 316.

scibus imposuerit, video multos esse qui ambigunt, & hoc demum ab illius posteris factum esse contendunt; cum in conspectum ejus omnes prodire non potuerint, aut ministeria aliqua illi exhibere. Neque aliam utilitatem potuisse ad Adamum ex his aquarum incolis illi, qui carnium esu abstinuisse antediluvianos omnes, redundare contendunt, præter solam voluptatem; quam ex pisibus in flaviis paradisi subsultantibus haurire potuit. *Reinbeckius* tamen, quo dominium hoc in fluviatiles non modo pisces, sed etiam marinos, plenius exercebat, artis urinatoriæ & fundi marini explorandi excellenter peritiam primo homini adjudicat (\*). Maledictionis, quam ob humanum scelus perpetra est natura, non fuisse subjectam aquam & aquatilia omnia, contendit olim *Augustinus* (b). Cum non aquis contra interdictum Divinum usus fuerit Adamus, sed de terræ fructu vestito comedenter; cumq; in diverso prorsus ab homine improbo elemento, & a nequitia ejus puro, pisces habitent. Adeoq; aquis a maledicto pepercisse DEum, & illis potius illud diluere voluisse, quod in diluvio factum esset, &, in expiatione per aquam baptismatis, hodienum fieret. Hinc nec diluvii plagam tetigisse aquarum incolas, sed terrena tantum pessum dedisse. Sed non opus est, ut paradoxæ huic opinioni retellendæ multis immoremur. Quomodo enim erunt a maledictione terræ immunes aquæ, cum ejus visceribus contineantur, illam ambiant, & illi intime admisceantur; cumq; aquatilia e ter-

(a) XVI. Betrachtung über die Augsburgische Confession, §. XXVI. (b) De mirabilibus scripturæ, L. I. c. IV. Conf. etiam Danæum, in prim. Mund. Antiquitatibus, p. 348.

e terra sint constructa, illaque vicitent? Insignem etiam diluvium intulisse aquarum incolis stragem, ostendit tam ratio, cum aliter evenire non potuerit, in pulmentacea illa massa terraqua, & fluido illo semifusio, cœnolo, crasso; quam ipsa experientia, cum piscium, vermium, zoophytorum, testaceorum diluvio submersorum, & in petram convertorum, plurima suppetant exempla, monumenta divinæ hujus vindictæ omni ære perenniora. Divisio legalis piscium sub veteri fœdere, in mundos nimirum & immundos, notissima est, dum pisces tantum squamis & pinnis instructi concedebantur Judæis in esum. Cum enim gentilium aliqui nullos, alii omnes promiscue, ederent, voluit DEus & hanc populi sui existere notam discretivam, ut aliquibus tantum, iisque pro saluberrimis judicatis, vescerentur. Nullum vero ex piscibus adhibere licuit sacrificium, vel ne aquis exempti mortui obferrentur; vel quia pisces non ubique haberi poterant (c); vel etiam, quod maxime probabile judicamus, ideo, quia pisces ob paucitatem sanguinis, ad cruentum Servatoris venturi sacrificium repræsentandum, erant minus idonei. Apud gentiles vero magno numero-cupidie prædæ marinæ onerabant lances Deorum, de qua re videri possunt *Aelianus* & *Athenaeus*. Reliquam Ichthyologiam Biblicalam brevibus attingere esset quidem res jucundissimi laboris, sed hoc non patitur instituti ratio. Id saltim indicare lubet, quod נַחַת speciatim mentione fiat in productione aquatilium, quo nomine non cetaceos modo pisces propriè dictos, sed etiam alias vastas belluas,

(c) Saubertus de sacrif. vet. c. XXIII. p. 530.

luas, aut ob formæ similitudinem, aut ratione molis, indicare solet scriptura. Cum vero per Cetacea hanc vocem reddiderint interpres, inde orta est perswasio, quasi piscis Jonam deglutiens fuisset ex cetaceo genere; cum tamen hi, ut ut vasti corporis, gulæ meatum habeant angustiorem, quam ut pisciculum, nedum solidum hominem, deglutire queant, sed exiguis pingvibusque vermbus vivant; nec ob pingvedinem in maribus regionum calidiorum, ubi deglutiebatur Jonas, vitam ducere queant. Hinc historiam hanc aptius quadrare in marinum canem Carchariam ostendit Bochartus (*d*), qui & Lamia, ἀπὸ τῆς ἔχειν μέγαν λαιμον, a gulæ vastitate dici solet, vel Squalum dorso plano dentibus plurimis ad latera ferratis, *Art.* Hunc enim adeo patentis esse rictus testantur itineraria, ut hominem, etiam obesum, etiam vestitum & loricatum, capere & devorare possit. Sed convertamur ad alia, visuri, non hunc modo Jonæ pīscem, sed etiam reliquos, prophetam sīnu suo fovere, & de magnalibus divinis posse mutam hanc turmam nos instruere.

## §. III.

**P**Artes itaque pīscium vitales imprimis contemplari lubet, earum vero palmarias tantum delibabimus, cum nec sufficientia hoc in negotio extent experimenta, nec, si vel prostarent, illa opusculi nostri brevitas capere posset. Caput eorum in antica corporis parte est situm, idque, pro ratione reliqui corporis, quamvis alias figura & proportione admodum variet, acuminatum; ut aquas dividendo, motum illorum

(d) Hierozoici part. II. libr. V. c. XII.

illorum celerem, in fluido hoc densiori, eo melius promoveret. Præterea illud ipsum ex ossibus firmis elasticisque, & insignis aliquando multitudinis, compostum esse deprehendimus; detexerunt namque historiæ naturalis scriptores, in unico perçæ capite, circiter octoginta ejusmodi ossium, admirandæ & singularis formæ. Arguit certe & hoc ipsum Conditoris sapientiam provideatiamque; ne enim aquarum impetu læderetur pisculum caput, contra earum vim, tam firmis & multiplicibus illud munitum voluit tegumentis. Si contuleris pisculum capita cum corpore reliquo, majora illa sunt, quam aliorum animantium; multo tamen minus possident cerebri. Ita observavit *Nicolaus Steno*, in cane Carcharia, cuius pondus superaverat ter mille libras, cerebrum vix fuisse trium unciarum. Hinc etiam pauci nervi e pisculum cerebro ortum ducunt, vix sufficiunt eorum motibus; sed compensavit hoc ipsum suprema Sapientia, per magnum nervorum numerum, quos emittit spinalis medulla, quæ per totum spinæ ductum continuatur. Dentes pisculum in diversis speciebus sunt diversæ magnitudinis & figuræ, ubique tamen nutrimento & indigentia accommodati. Ita multis sunt acuti, ad prædam comprehendendam; dum aliis latiusculi, ad diringenda ostrocoderma, contigerunt. Est etiam situs eorum maxime memorabilis; apud nonnullos enim sunt in maxillis, apud alios in faucibus, in aliis utrobique. Interdum in maxillis & lingva adsunt. Aliorum lingva glabra est; maxillæ vero palatum & fauces dentati. Alibi fauces glabritiem possident; dentes vero in maxillis, lingva

vel palato conspicuntur. Sunt denique, in quibus omnibus hæc partes dentibus instruuntur. Pisces collo carent, in quo miram naturæ analogiam conspicere possumus; quæ, ut in animalibus terrestribus, quadrupedibus nimirum & avibus, colli longitudinem juxta pedum mensuram proportionavit, ita quoque in piscibus eundem servavit ordinem; & illos, quandoquidem pedibus, qui illis essent supervacanei, destituuntur, collo quoque privavit. Pisces tamen Cetacei, pulmonibus instructi, etiam collum possident. Sunt in his respirationis organa eadem, quæ in animalibus terrestribus, quibus, dum caput extra superficiem ejus elevant, aërem excipiunt; quo tacto, aquas subeunt, & paulatim eum exspirant; eo vero prorsus redditio, ad summam aquam illis iterum est redeundum. Quod autem reliquos pisces concernit, neque illi aëris beneficio carere possunt. Ostendunt enim experimenta academicorum *del Cimento* (e), etiam hos in vacuo extemplo intumescere, deinde supinos quasi semimortuos jacere, &, aëre tandem admisso, ad fundum præcipitari, ibique non convalescere, sed interire. Aperti vero vesiculam aëream collapsam & inanem ostentant. Respirare pisces, etiam inde constat, quod in stagnis & lacubus glacie densiori obstrictis copiose moriantur. Illud quoq[ue] sub nimio calore & aquarum putrescentia evenire animadvertisit. Idem fit, si in piscinis fuerint plures, quam par est, ut nimirum pabuli hujus aërei defectu pereant; quæ omnia gravissimam omnino injiciunt suspicionem, vel ostendunt potius, pisces etiam pulmonibus carentes, habere tamen, qualisimile quid præstent, partem. Perfunguntur hoc officie

(e) Edit. Müschenbr. p. 108. seq.

ficio branchiæ , quibus omnes , exceptis cetaceis & Petromyzo, instructi sunt. Hæ mox intra caput , & quatuor ab utroque gulæ latere, situm acceperunt, quarum , quæ cordi proxima & infima jacet , semper minima est , tres autem superiores tensim & ordine majores. Est earum situs & structura maxime notabilis. Constant namque ex infinitis justa serie dispositis & inter se connexis laminulis osseis, membranis , pilis, innumerisque valorum ordinibus & ramificationibus. In Carpioni vel Cyprini art. sp. 13. branchiis 4386. officula sunt observata ; arteriarum vero ramifications 4320. totidemq; nervorum & venarum (f). Miranda sane hic comparet fabricæ elegantia, sed admirandus magis usus ; sanguis enim à corde in aortam protritus, recipitur ab ultimis harum branchiarum partibus, ubi venas subintrat, quæ sensim in truncum quendam magnum, secundum spinam dorsi procurrent, & aortæ descendentes munere fungentem, concurrunt & exonerantur Antequam tamen hoc facit vena ex supraea branchia vel semicirculo osleo certum ducens, ad organa sensuum & cerebrum divertit, illisq; necessariam sanguinis copiam largitur. Quod autem pisces branchiis suis aërem cum aqua hauriant, superius allatæ rationes dubitare nos non sinunt , unde pulmonum munere fungi illas concludimus, quamvis ab his in quibusdam discrepent, & inversos quasi pulmones , quæ ab ambiente possint affici , repræsentent. Quomodo autem aër branchias intret , ibique tparetur , difficile videtur indicatu, cum aperturæ aliquæ in illis non animadvertantur; quas tamen ideo negare neutquam licet. Cor pisium

B 2

mox

(f) Scheuchzeri Jobi physica sacra, p. 96.

mox infra branchias in pectore situm accepit , & , quamvis sit figuræ diversæ , in eo tamen apud pisces omnes branchiis præditos convenit , quod unico instruatur ventriculo , crassis parietibus munito ; unicam etiam habeat , sed ingentem , auriculam . Sunt hæc de sapientia divina luculentissima testimonia , quæ non adeo est certis agendi organis alligata , quin diversis instrumentis idem præstare munus valeat . Peti his similia possent ex reliquis visceribus & partibus vitalibus piscium , si , ut diutius his immoremur , pateretur instituti ratio . Cupidum itaque harum rerum ad anatomiae comparatæ scriptores ablegamus , & in primis ad Artedi Philosophiam Ichthyologicam , quæ & nobis in plerisque fuit instar omnium .

## §. IV.

**E**X his itaque jam patescit , quod piscium respirandi modus sit elemento eorum sapienter attemperatus , & sanguinis in illis circulus ad gradum caloris naturæ eorum , & habitaculo , convenientem servandum , accommodatus . Ut vero felicius partibus suis fungi possent , in fluido illo densiori & frigidiori , cor & branchiæ , neque piscibus tantam dedit Creator sanguinis copiam , ac animalibus aërem inhabitantibus . Sed videtur nihilominus primo intuitu difficile captu , quomodo & hæc exigua sanguinis massa , qua prædicti sunt pisces , justam subire potest circulationem , ita ut non frigore grumescat aut concrescat ; in primis cum hi in regione hac sua frigida , non sint muniti mediis illis contra ambientis fluidi injurias , quibus gaudent , in elemento licet mitiori , quadrupedia & aves , quæ cute

cute crassiori, pilis & pennis sunt vestita. Sed si rem hanc paulo accuratori subjecerimus examini, deprehendemus, pisces nec destitui indumento sibi congruo, & mediis calorem naturalem conservantibus. Non enim tantum muco quodam & gelatinoso humore, corpora illorum externe ungente & lubricante, obducuntur, qui in recenter ex aqua protractis compareret, quique ex poris corporis & vasis excretoriis feceruntur; verum etiam pinguedo quædam & oleosa caro cuti subjacet. Ubi iterum infinitam summi Numinis sapientiam & bonitatem venerari nobis licet, quæ eos tam aptis & ad finem sufficientissimis, contra inclemantium regionis aqueæ, munivit tegumentis. Mucus enim ille externus non tantum impedit introitum aquæ in vaçula cutanea, verum etiam natationem multo faciliorē reddit. Adeps autem cuti proxime adjacens, & corpora piscium circumcingens, non modo gravitatem eorum specificam ad proprius cum aquæ pondere æquilibrium reducit, sed etiam calori naturali conservando inservit, frigus aquæ aracet, & indumenti loco illis est, cuius ope intenditur, per reflexionem exhalationum, calor naturalis. Corpora enim pingviora minus sentire frigoris incommoda, quam macra, constat. Unde quoque evenit, quod in plerisque piscibus observavimus, ut, quomagis habent adipis, eo majori prædicti sint sanguinis mastæ. Hinc etiam cetacei pisces, quibus frigidissima assignata sunt maria, adeo stupendam adipis & olei possident copiam. Sed quamvis his caloris conservandi mediis instructi sint pisces, constat tamen expes

experientia , quod in illis adhuc viventibus respectu nostri tactus ventriculus sentiatur frigidus , licet deprehendamus , nonnullos non tantum integros pisces , verum etiam insecta crustacea , & ipsa testacea cum crustis , deglutire & bene digerere ; unde liquet , caloris non esse magnas partes in ciborum dissolutione . Utpote vero pinguedine & oleo , quod aquæ oppositas possidet facultates , obduxit corpora piscium Conditor , ita insuper non cuti modo illa involvit , sed etiam multis squamas , duritie sua illis præsidio futuras , concessit , quæ in pulcherrimo & sapientissimo ordine corpus obtegunt . Observavit exilissimas ejusmodi squamas in anguillarum etiam cute , & delineavit *Lævenbækius* , easdemq; elegantissimas , cum ex globulis , plus minus pellucidis , totæ componantur . Unde esum ang villarum non fuisse lege Mosaica prohibitum , cum pinnatæ etiam sint , concludit . Sunt autem squamæ corpora plana , semipellucida , ex materia cornea & ungvibus affini constantia , quod ex odore illo terti , quem emittunt , dum in igne cremantur , concludere licet . Has corporis tutelæ ab injuriis externis dicavit summa Creatoris sapientia . Et melioribus certe pisces nunquam muniri potuissent loricis ; sunt namque & leves , & politæ , & motui eorum proportionatae .

## §. V.

**D**elineatis sic partibus aliquibus piscium vitalibus , ordinis jam exigit ratio , ut sensuales etiam breviter recenseamus . Visus itaque illorum considerationem nostram jam subibit . In visionis negotio , & oculi

oculi machina, tot obveniunt stupenda, ut *Sturmius* merito contendat (*a*), atheistum non posse inveniri, & habere locum in illo homine, qui vel unius oculi fabricam attento animo, destinata malitia non præpedito, aut indurata justo DEi judicio mente, inspexerit. Est vero adeo innumerabilis oculorum, uno eodemque tempore reperiundorum multitudo, supra terræ vastissimam superficiem, intra ipsius crustam superiorem, ac per aquas toto orbe diffusas, ut dubitaverit *Schwenterus* (*b*), plures ne oculos quam capillos, per universum terrarum ambitum, reperiri credendum sit? Qui omnes, quamvis quoad maxime essentialia, inter se convenient, ingentia tamen discrimina, præsertim in diversis animalium classibus, conspicienda exhibent. De oculis itaque piscium in primis observandum, quod binis, uti reliqua perfectiorum, ceu dici solent, animalium illas instruxerit natura, eosque plerumque a lateribus capitis collocaverit, ut colli in iis defectum compensaret, utque integrum circulum videre, & ab insidiis eo melius sibi cave-re possent. Sunt etiam alia in oculis eorum attentione maxime digna, & in iis hoc, quod planiori plerumque neque prominenti prædicti sint cornea, cum rotunda & protuberans illis non fuisset conveniens, motum enim illorum, in elemento hoc denso, non tantum impedi-visset, verum etiam, per crebrum aquæ impulsum, facile lœdi potuisset visus organum. Aqueo humore carere potuerunt piscium oculi; hinc neque natura, quæ sub omni pompa sua parca est, nec temere quid-

quam

(*a*) *Oculus θεότητος*, in epilogo. (*b*) In delic. Phys. Math. p. I. probl. LIV.

quam dilapidat, eum illis concessit. Chrystallinum tamen dedit, eumque rotundum. Ex regulis dioptricis notum est, ad distinctam visionem requiri adumbrationem objecti in retina justam, ex radiorum in oculi humoribus refractione ortam; quodque radii lucis, dum e fluido rariori in densius transeunt, debilitentur, & refractionem versus perpendiculum patientur. Hinc pisces, si eorum oculi essent similes nostris, obscurius & confuse objecta viderent, lumen enim minus aequo refringeretur, nec conveniret in fundo oculi, sed loco aliquo ulteriori. In humano oculo tria sit radiorum refractio, in piscium vero tantum bina. Necesarium itaque erat, ut chrystallinus eorum humor fortius lumen refringeret. Fortissime hoc agit corpus sphæricum. Ad tollendam itaque hanc difficultatem, & ut pisces distincto necessitatibusq; eorum accommodato prædicti essent visus sensu, lemniscularis convexitas erat exacte rotundanda, ut in illam & plures radii incidere possent, & illi eo melius in pupillam detorquerentur. Quod etiam factum esse animadvertisimus. En itaque conspicilla convenientissima, his animalibus divina manu constructa! Illaque ita sapienter adornata, ut testetur *Nieuwentijt* (c), sibi innotuisse de maximi momenti veritatibus dubitatem, qui ex solis illis observationibus, quas circa oculos piscium instituit, & physicæ suæ inseruit *Robautius*, fuerit eo usque convictus, ut cogeretur facili, oculos hos, & imprimis eorum figuram, testari finem evidentissimum, & perfectam in Construc-

(c) L. e. p. 529.

te optices cognitionem , adeoque existentem Deum , in operibus suis conspicuum , & a creaturis colendum . Artificium hoc Divinum etiam imitari aliquatenus dicere homines . Hinc urinatores , qui sub aquis lumen quidem & colores vident , sed confuse omnia , vitrum convexum præ oculis tenent . Eadem quoque est ratio , cur senes , in quibus visus , ob imminutos oculi humores , & planitiem Chrystallini , est debilitatus , & imago in fundo oculi paulo confusius depingitur , tantur , ad explendum hunc rotunditatis defectum , vitris apta proportione convexis , quorum ope radii fortius concentrantur , & consequenter ipsum objectum clarius in oculo adumbratur . Detexerunt præterea anatomici in oculis pisium , sib tunica choroidea , musculosam quandam substantiam , nervum opticum ambientem ; de cuius officio quamvis nihil certi constet , illud tamen credit *Derhamus* (d) in eo perquam probabiliter consistere , quod ejus ope pisces possint chroidem contrahere , adeoq; oculum aliquantum aut prolongare aut abbreviare . Deprehendimus enim , quod aqua multis mutationibus sit obnoxia , & præcipue æstivo tempore , quæ diversam caussantur luminis refractiōnem ; adeoque pisces singulari ejusmodi apparatu , quo visum secundum diversas aquæ qualitates instituere & mutare possint , videntur indigere , utque pericula non tantum facilius animadvertere , verum etiam ejusmodi objecta , quæ victui illis inserviunt , tam e longinquō , quam propinquō videre possint . Singulare aliud in pisium visu observavit *Willisius* , quod cum

C

nervi

(d) Phys. Thcol. libr. II. c. II.

nervi optici ad utrumque oculum tendentes, in cæteris animalibus, ad se invicem inclinentur, nec tamen, nisi tantam summa superficie tenus, conjungantur, in his decussatim e cerebro veniant (*e*). Postquam itaq; maxime memorabilia illa, quæ de oculis piscium nobis cognita fuere, breviter attulimus, postulat ordinis ratio, ut nonnulla quoque de eorum auditus sensu in medium proferamus. Circa quem imprimis tenendum, quod in piscibus, exceptis cetaceis, justum & naturale ejus organum nondum sit detectum; adeo ut adhuc dubium sit, an auditu proprio dicto gaudeant. Fuere etiam, qui aqueam molem a commoto aëre non agitari, sed ejus tremoribus resistere crediderunt, adeoque sonum in aquis continuari non posse (*f*). Quos tamen refellit non solum tam in submersionis periculo constitutorum, quam urinatorum experientia, qui sonos etiam articulatos in minori aquæ profunditate audire potuerunt (*g*), quamvis, altius demersi, ne graviores quidem sonitus percipient (*b*); sed ipsa quoque circa pisces observata. Ut enim *Aelianus* & *Plinii* dubiæ fidei narrationes: de piscibus in vivariis ad humanam consuetudinem mansuetissimis, & appellantis heri vocem intelligentibus; de murena in primis *Craffi*, quodque in Cæsaris piscinis genera piscium ad nomen venerint, quidam etiam singuli; ut inquam has & similes alias missas faciamus; id in confessio est, quod sonos graviores animadvertant pisces,

(*e*) Joh. Clerici physica, Libr. IV. c. V. (*f*) Le Grand hist. nat. p. 419. (*g*) Tiselii beskrifning öfwer Wättern, p. II. p. 50.

(*b*) Triewalds konst at lefva under watten, p. 19.

pisces, uti tonitrua, explosiones pulveris tormentarii, nolarum pulsus, aliosque ejusmodi, qui motum in aëre tremulum fortiorum excitare possunt; unde occasio nobis subnascitur credendi, illos obscurum quodam auditus sensu præditos esse. Quæ tamen perceptio an per visum potius & tactum, defectum aurium suplentes, quam per certum auditus organum, quamvis nobis hactenus non animadversum, fiat, aliorum esto judicium. Nos potius hoc iterum in puncto miram & sapientem summi Conditoris œconomiam veneramur, qui sicuti omnia perfectiora animalia terrestria ideo potissimum auditus sensu acutiori instruxit, quia ipsam et sunt vocalia & sonum edunt naturalem, ita multis his aquarum incolis idem æquali gradu non concessit donum. Ut tamen omnium sonorum, præcipue graviorum, non essent ignari, & sibi a periculis imminentibus cavere possent, defectum hunc, quantum requirunt eorum necessitates, supplevit, illosque obscuriori instruxit auditus sensu, vel auditui analogum quid dedit. Subibit jam considerationem nostram tertius sensus, nimirum odoratus, quo animalia instruxit Conditor, ut ante saporem vim deprehenderet alimenti, & naturæ gratum admitteret, alienum vero amoliretur, vitiumque rei olfactæ accusatæ antea, quam illa injuriæ inferre potuit. Hujus sensus organa in piscibus tantum non omnibus manifeste comparant, nares nimirum, eæq; in multis præ quadrupedibus & avibus geminatæ, ita ut bina-narium foramina utrinq; compareant. Quod procul dubio ideo factum est, ut rerum victui illis inservientium salubritatem ex-

Eius explorare possent. Erat vero id hic eo magis necessarium, cum sensum gustus in piscibus plerisque ita abdiderit natura, ut an adsit, ubinam sedem habeat, & annon potius omne ciborum utilium discernendorum, & voluptatem ex iis percipiendi, negotium, sit odoratui commissum, nondum queat certo defini-ri. Lingvam quidem, vel saltem ejus rudimentum, possident pisces omnes, cujus munia pleraq; ea sunt in cetaceis, quæ in quadrupedibus. In reliquis pisci-bus est immobilis, adeoque non volutationi cibi, nedum flexioni vocis, interviens; nec præterea genui-ni gustus organi officio fungi posse videtur, cum in plurimis non sit fungosa & papillosa, ut aliorum ani-mantium, sed cartilaginea, adeoque ad impressiones corporis sapidi minus idonea. Neque tamen otiosa in ore eorum hæret; sed conductit deglutiendis cibis, hinc elatior illi datus est locus, quam partibus faucis lateralibus. In piscibus etiam dentatae lingvae ad præ-dam insuper retinendam inservit. In ultimo eorum sensu, tactu nimirum, delineando, diu desudare non de-cesset; nihil enim singulare & observatu dignum de eo nobis constat. Per eadem namque organa excitatur hic sensus in piscibus, ac in reliquis animalibus; & eo-dem quoque modo in tecto corpore æquabiliter est diffusus.

## §. VI.

**P**rogressimur jam ordine ad partes piscium motui dicatas considerandas; visuri, quomodo hæc eo-rum natatio, methodo maxime naturali & secundum fixas regulas, peragatur. Ex hydrostaticis constat, cor-pora

pora reliqua esse respectu aquæ in triplici differentia; vel enim specificam aquæ gravitatem superant, tumq; fundum eidem immersa petunt; vel æquant eandem, & hæc ad quamcunque profunditatem quiescent; vel denique aquæ gravitatem specificam non attingunt, quæ ejusdem superficie innatantia conspicuntur. Si itaque pisces quoque perenni & immutabili instructi essent corporis pondere, aliquod horum eveniret, neque adscendendi & descendendi libera potestate gauderent. Cum tamen testetur experientia, quod sine aliqua molesta corporis sui agitatione, pro lubitu jam fundum petere, jam in quocunque aquæ altitudine subsistere, jam maxima velocitate ad superficiem ejus se elevare possint. Parit hæc res magnam admiracionem, & primo intuitu difficilis omnino videtur explicatu; cum huic ului membra & media nulla, qualia illa sunt, quibus aves in aëre sustentantur, apud pisces in propatulo sint collocata. Dum vero eosdem aperimus, deprehendimus apud plerosque vesicam quan-dam vel membranam concavam, aëre plenam, ex variis sibi superimpositis lamellis constantem, vel libere pendentem, vel spinæ dorsi affixam; eamque ita comparatam, ut antrorum ossibus quibusdam, circa basin capitis, non procul a branchiarum inter se coalitu, coëuntibus, plerumque adjaceat, ex posteriore vero parte ductum vel canalem quendam pneumaticum habeat, ventriculum vel ejus orificium ingredientem. Admirandum hoc utcunque simplex artificium, vesicam puta aëream, pisibus eum in finem fave-nitor concessit natura, ut ad æquilibrii cum aqua ambien-

ambiente promptissimam restitutionem , vel immutationem , illis inserviat . Nam quantum corpus piscis aquæ præponderat , tantum inclusus aër eadem est levior , unde illud cum aqua ad æquilibrium redigitur . Inclusus vesicæ aër non modo pro diversa aquæ gravitatione magis vel minus comprimitur ; sed etiam in facultate piscis est , quantitatem & volumen aëris in concavitate hac vel augere vel imminuere , adeoque æquilibrium suum cum aqua & gravitatem specificam mutare . Quando namque musculi abdominis comprimuntur , mox aëris aliqua quantitas per duæm posteriorem expellitur , adeoque piscis , volume nonnihil imminuto , ipsa aqua specificè gravior , suo ipsius pondere jam denergitur . Unde quoque est , quod pisces , dum fundum petunt , bullulas quasdam aëreas emittant . Facta vero contra muscularum relaxatione , aër vesicæ inclusus vi sua elastica se expandit , corporisque volumen auget , ut piscis maioris quam antea spatii impletione , ipsa aqua specificè levior fiat , atque sic ad superficiem sursum pellatur . Quod vesicæ hujus aëre turgescens hic quidem , qui jam expositus est , sit usus , patet non tantum exinde , quod pisces & animalia pleraque , quæ vesica hac carent , temper in fundo aquæ versentur , nec ad summam le possint elevare ; verum etiam hoc confirmat experimentum Borelli . Si namque pisci vivo vesica hæc aërea vel eximatur , vel acu tantum perforetur , non amplius ad superficiem aquæ potest adscendere , sed instar vermis in fundo repit . In nonnullis præterea duplikatum hoc aërophylacium observamus , cuius concame-

ratio-

rationes per interjacentem ductum quendam breviorem, inter se communicant, ut aëri levi musculo-rum abdominis constrictione ex una in alteram possit impelli. Hæc vesicæ duplicatio illum singularem usum habere videtur, ut volumen anticæ vel posticæ partis corporis augeri vel diminui queat, adeoque pisces vel capite vel cauda citius elevari, & oblique per aquam adscendere vel descendere; cum, nisi hoc esset, vix aliter, quam in linea horizonti parallela, toto simul corpore, esset illi vel adscendendum vel descendendum (a). Ad celeritatem etiam motus facit duplex hæc vesica, unde observamus, quod illi tantum pisces ea sint instructi, qui celerrime & instar avis in aëre volitantis, moventur. Fœcundissimum certe in constructione hujus vesicæ & ductu pneumatico adest sapientiæ divinæ indicium; perpendamus enim, quot quantisque subjecti essent difficultatibus & incommodis pisces, nisi mutabilis illis ejus ope contingisset gravitas, ita ut jam alte, jam depresse, pro indigentia sua, in aquis morari possent. Ut enim alia taceamus, si fixum pondus ab aquæ illo non multum diversum continuo servarent, pisces certe anadromi, ex fluvialibus in falsas transeuntes aquas, semper cogarentur vel inviti in superficie earum morari; iidem vero in dulcibus fundum peterent, ut ovum dulcibus immersitur aquis, falsis supernatat. Dum vero pio animo perpendimus proportiones illas fere plus quam mathematicas, quæ intercedunt piscium magnitudines ac gravitates specificas, & ambientis aquæ; ves-

ca

(a) Vid. Hollmanni introd. in Physic. p. 602.

cæ etiam capacitatem diversam, sed convenientissimam; aërisque contenti pondus exactissima ratione observatum; non possumus non stupendæ heic eluentis sapientiæ, providentiæ & potentiae veneratione percelli. Quis vero atheorum adeo obduratus erit, ut contendere audeat, regulas hydrostaticas, aëreometricas, & motus muscularis, hic adeo constanter, cau quodam cæco & absque intentione sapientissimi alicujus artificis, observari? Quis piscibus illam indidit sagacitatem, ut in compressione & dilatatione vesicæ suæ, debitum semper servare modum sciant, & tantum intrumittere vel ejicere aëris, quantum ad locum desideratum obtainendum opus est? Annon hoc Creatoris sapientiæ est tribuendum, qui in nobis ipsis, rationis licet dono instructis, varia peragi jussit, quorum ipsi sumus ignari? Hoc unicum adhuc de vesica aërea piscium, tanquam maxime memorabile sapientiæ divinæ indicium, quæ eosdem effectus mediis diversis producere valet, addere liceat, quod omnes pisces ea non sint prædicti, idque ob rationes sufficientissimas, quandoquidem illa non adeo indigent. Ita cetaceis, cum in pulmonibus suis possideant aëris modificandi instrumenta, tristra data tuisset vesica; utpote etiam illic, quibus in fundo aquarum domicilium assignavit natura. Sunt etiam aliqui, qui forma corporis lata planaque, vel etiam longa maxime teretique, vesicæ hujus detectum supplent. Circa cartilagineos pisces, quorum structura est mollior & spongiosior quam reliquorum, quique multum aëris in cavitate abdominis possident, quamvis vesica careant, conjectura est

Raji

Raji (b), quod gravitatem corporis vel majorem vel minorem reddant per receptam & evacuatam aquam, ope duorum foraminum in inferiori abdominis parte. Et ex his quidem patet, motum piscium, vesicæ hujus æquilibrium illis cum aqua conciliantis ope, multum adjuvari. Sed eorum natationis progressivæ palmarium instrumentum est cauda; ejus namque flexio ad dextram & sinistram non tantum corpus simul flectit, ut gubernaculum navim; verum etiam eadem vibratio progressum promovet, quod experimentum illud vulgare, cuius, perinde ac gubernandi artis, pisces fuere nobis doctores, ostendit, dum lembi cursus promovetur, per repetitam flexionem remi unius brevis & lati in puppi. Et heic mira naturæ solertia eluescit, quæ caudam & remigii & temonis usum in motu piscium locali præstare jussit, cuius ope jam celerius jam tardius progredi possunt, & alternante ejus ad utramque partem vibratione, cursum rectilinearem servare. Admiranda ad hos usus est tam caudæ hujus structura, quæ in plerisque piscibus est bifurca, plicabilis & lata, ut eo magis aquam pellere & cursum piscis promovere possit; quam materia, ex qua constat, nimirum flexilis & cartilaginea. Ad vibrationem vero hanc spinæ dorsalis & caudæ peragendam inserviunt musculi dorsales, & interiores inter anum caudamq; , ille que omnium in tota machina crassissimi & fortissimi; quo non modo æquilibrio posticæ partis angustioris, cum antica crassiori, consulitur, sed etiam insignis vi rum muscularium quantitas emergit, ad motum per

D aquas

(b) La sagesse de Dieu dans la creation, p. 412.

aquas accelerandum sufficientissima , unde major hic adest vis motiva , quam quæ in volatu avium consipi- citur , quamvis & hæc sit perquam magna. Hincque evenit , quod possint pisces eadem celeritate aquas finde-re , qua telum ex arcu emissum aërem transit ; quod-que grandiores eorum tanta vi corpus commoveant , ut , quæ de cetaceis potissimum perhibentur , non absque stupore legi queant. Nec facile quisquam est , qui pisce vegeto & majori ex aquis in aërem , ubi ta-men est resistentia multo minor , protracto , quanta renitendi vi polleat , non fuerit sub pescatione exper-tus. Fuere quidam , qui remigiorum officia in natatu piscium promovendo etiam pinnis eorum voluerunt tribuenda , vel partibus illis e corpore prominentibus , quæ constant ex membrana , quam ossicula vel dura vel cartilaginea radiorum instar fulciunt , quæque eam non modo sustentant , sed etiam firmant & rigidam fa-ciunt , ut aquæ propellendæ par sit. Sed hos refellit non exiguitas modo illarum respectu molis promovendæ , sed etiam autopsia ; natantes enim has magis corpori apprimunt quam dilatant. Hinc motui potius quodammodo retardando & dirigendo inserviunt. Idem ex-perimento colligitur. Si enim forfice rescidantur pin-nae pisces vivi , aquæ tamen redditus , velociter quaqua-vorum natationem instituit. Tum quoque simul in con-spectum prodit , cui fini palmario a natura sint assignatae ; quod nimirum pinnæ pectorales & ventrales sta-tioni imprimis pisces inserviant , & pedum quasi gerant officia ; dorsales etiam & ani sustentaculorum instar plurimum faciant ad situm corporis naturalem ser-vandum,

vandum. Rescissis enim pinnis mox titubant pisces, & in dextrum sinistrumque latus ebriorum more vacillant, neque gradum amplius firmare possunt. Si omnes demseris, supino jam natant corpore. Quod enim prono naturaliter ferantur, id non centro gravitatis est adscribendum, quod, ubi copiosissima adest caro & maxima ossium pars, in dorso nimirum, invenitur, sed pinnis his, imprimis ventralibus, quibus instar pedum corporis moles suffulcitur.

## §. VII.

**T**Acta iam leviter piscium anatomia, generationis & propagationis, in hac animalium classe, modum paucis considerabimus. Fit hic, ut in reliquis vi vis omnibus, propagatio per ova; hinc femellæ piscium ovario instruuntur, dupli plerumque, rarissime unico. Quod, ut pro ratione situs & figuræ variat, ita etiam ova jam pauca, jam aliquanto plura, saepe autem fere innumera, continet. Sunt horum aliqua magna satis, vitellum & albumen cum cicatricula distincte exhibentia; pleraque exigua & simplicia, in quibus nulla harum partium distinctio comparet, quæque forte vitello carent, cum foetus ex aqua cui insunt nutrimentum haurire queant. Ad fecundanda & prolificare reddenda haec ipsa ova mares vesiculis seminalibus binis gaudent. Sunt piscium aliqui vivipari, ut cetacei & cartilaginei plurimi, ubi masculi testes & paraestatas, alter sexus uterum, possident. Maxima vero hujus familiæ pars ova parit. Occurrunt tamen in hac piscium propagatione varia, quibus ad hunc usque diem perfecte rimandis hominum non sufficit perspicacia. Generationis enim

D 2

hujus

hujus subjecta in elemento ejusmodi vitam degunt, ubi ab oculis hominum abscondita latent, ita ut ad omnes eorum actiones, aut omni tempore, attendere nequeamus. Hinc cum in nonnullis ova detegere non potuerint homines, ad fabulosos eorum ortus prolapsi sunt. Ex. gr. dum de angvillis docet *Plinius*, illas atterere se scopulis, eaque strigmenta viviscere; vel dum vulgus nostrum angvillulas ex nescio qua machina, *Åblmodran*, prognasci contendit. Quæ quidem res jam est clare decisa, scilicet angvillas esse viviparas (*a*). Circa oviparos vero pisces contenditur, qua ratione & ubi fiat apud hos ovorum fœcundatio? Credebatur, feminas primo ova sua in aquis deponere, supervenientes deinde mares hæc laete suo conspergere, & illa ratione prolifica reddere. Sed huic quidem opinioni, quæ multorum adhuc hæret animis, validissimum opposuit argumentum *Celeb. Linnæus* (*b*), petrum ex analogia. Cum enim nullibi in natura, vel in regno vegetabili integro, vel animali reliquo, fiat ovi fœcundatio extra corpus maternum, neque id hic temere asserere licet. Observavit vero insuper *Vir experientissimus*, esoces, percas, cyprinos, dum instat generationis tempus, congregari, mares genitram per aliquot dies prius emittere, quam ova ponunt femellæ, & has illam summa celeritate avide ore hauisse. Neque raro dum pisces ludunt conspicere licet, binos vel tres se uni approximare, & ore hiante eundem

(*a*) *Tiselius* l. c. p. I. p. 113. & II. p. 110. *Kongl. Vetenskaps Acad. Handlingar* 1750. p. 194. (*b*) In *Arted. Philos. Ichthyol.* p. 32.

dem abeunte in equi. Conspicat his *Needhamiana* obseratio (c); dum, ex cicatriculae figura in ovo ræ, concludit, illud ante exclusionem fuisse fœundatum. Quis vero in his ipsis iterum non videt omnipotentem, providam & sapientem DEI manum? Quis admiracionis & gratitudinis affectum verbis dignis exprimere vallet? Pisces illi, quorum caro est gustus nauleosi minusque sanitati conducit, quorumque figura aliis terrorem injiceret, illosque abigeret, vel qui nimis de prædarentur reliquas imbecilliores species, paucos procreant partus; & eadem sapientia, quæ fertilitatem illorum inter salutares compescuit limites, iisdem in alto mari remotas a nobis assignavit sedes. Reliqui autem, quorum usus sunt abundantiores, in nostris fluvii lacubus aut litoribus, vel semper commorantur, vel etiam periodicis migrationibus, ut nimirum ad plures gentes dispergantur ex illis enascentia commoda, aquas nobis viciniores tuebunt. Peripateticæ hæ species accurate statis temporibus itinera hæc sua instituunt. Numerosissimus populus maria vasta pertransit. Viam & cursum solitum servat. Exercitus integer, tanquam sub duce peritissimo, unitus manet. Nullæ ibi lixarum & calonum greges, transfigæ nulli, nulla impedimenta. Sunt inter gregarios ejusmodi & migratorios pisces haleces vel harengi, qui jam ad Scotiæ Angliæq; litora migrarunt, ibique stativa habent, quarum avium squamatarum venatione Batavi sibi immensas pararunt opes, quasque eo allici vermiculis copiosis.

(c) Nouvelles decouvertes faites avec le microscope, Chap. X.

piissimis, quibus vescerentur, contendit *Lævenbækius* (d). Proavorum tamen seculo ad fretum Balthicum & Scaniam erat patria piscium illorum; circa quam olim maxima, & quæ fidem pene excederet, præda illorum acta; ita ut, teste *Saxone Grammatico* (e), navigiis impacti remigii conamen eripuerint, nec artis instrumento sed simpli- ci manus officio capti fuerint. Tum etiam agminatim eo plicationis causa contendebant Hanseaticæ urbes, quarum præcipius punctionis locus, privilegiis illis concessus, erat *Falsterbo*, ubi adhuc suo ævo domicilia eorum cerni potuisse, licet pleraque vetustate collapta, testatur *Neocrantzus* (f). Ejiciunt vero pisces ovipari, ut e diverticulo in viam redeamus, ova pluri- ma, & multæ species tantum non innumera. In te- stimonium rei adduxisse sufficiat, quod nuper citatus *Lævenbækius*, qui in lactibus unius aselli majoris se tantam animalculorum seminalium multitudinem de- texisse contendit, ut plus decies superet hominum in universo terrarum orbe viventium numerum; idem in feminâ, idq; certiori calculo, deprehenderit 9340000. ova. Est certe piscium fœcunditas tanta, ut omnes aquæ illis implerentur, nisi magna ovorum egessorum pars vel a maribus ejusdem generis, vel ab aliis pisci- bus & animalibus aquatilibus, devoraretur. Non au- tem quisquam frustra condita hæc ipsa ova, quæ alii mox in pastum cedunt & corrumpuntur, temere opi- netur. Neque enim ipsi solemus gallinis nostris vitio vertere, quod plura pariant ova, quam excludere va- lent,

(d) Ep. phys. 42. (e) In prefat. Dan. histor. Conf. etiam Pontani discuss. histor. L. I. c. 14. & Olai Magni histo- rie L. XX. (f) De harengo, p. 57.

lent, & una interdum plus quam trecenta anni unius tempore. Ne vero rapina illa speciem ullam vel plane perderet, vel ad justo minorem redigeret paucitatem, adeo divites ovariorum racemi feminis dati sunt, ut ova stupenda multitudine, instar granorum papaveris vel milii, emittere possint; & matribus illa sagacitas indita, ut partui suo diverticula querant. Ova illa, quæ non absuntur, calor excludit, alia citius, tardius alia, & inde elapsi pisciculi mox natare & victimum querere sciunt, sine ulla matrum cura aut institutione. Hinc jure querit Franzius (g): *Quis incubat ovis? quis infantulos pisces defendit? quis ut in infinitum augeatur hoc genus animalium, suo nutricatu efficit, nisi solus Deus?* Comparationem mox instituit inter animalia domestica, quorum curam suscepit homines, quæque magna cum difficultate educantur, quorum tamen multa ova, multi fœtus & matres, intereunt, quæque morbis conflictantur innumeris, superantibus haud raro omnem nostram curam & sapientiam; & inter ferrea animantia, aves, piscesque hos nostros, qui licet hisce adminiculis destituantur, melius tamen augmentur neque tantos morbos experiuntur, quia ipsorum generatio & ortus soli DEo committuntur. Unde disce-re jubet œconomos, in benedictione Domini plus situm esse, quam in quotidianis curis & laboribus humanis.

## §. VIII.

**Q**uod ad alimentum horum animalium attinet, credendum merito est, naturam large & copiose de victimâ unicuique eorum apto & commodo prospexit.

Omnis

(g) Histor. Animal. p. m. 493.

Omnis quidem , qui tantum in superficiaria elementi hujus contemplatione hæret , existimaret facile , illud sufficientem & abundantem incolis suis non posse tribuere cibum , præcipue cum horum numerus sit tam stupendus. Ast dum aquam paulo attentius consideramus, deprehendimus mox , illam ditissimum incolis suis præstare victuarium , quod præcipue ex motu eorum veloci corporeque obeso colligere licet. Adsunt enim præter limum in aquis non plantæ tantum variæ , sed etiam insecta aquatica plurimorum generum, vermes & zoophyta, mures, ranæ, colubri, aves, aliaque, quæ ingurgitant pisces. Multi quoque eorum proprii generis impendiis vivunt , & sibi invicem non ova modo & lactes suffurantur , sed etiam pisces alios deglutiunt. Adeo ut hic adsit bellum omnium in omnes ; vis fraus & rapina grallentur ubique. Hinc Auctor *specaculi nature* (a), acerbo sale satyrico genus nostrum perficaturus, mirari se profiteretur, quod nondum rationem animalibus hisce , adeo humanos mores referentibus, adjudicaverint homines. Interim æquilibrium specierum inter pisces semper servari & custodiri animadvertisimus. Sunt eorum aliqui, quorum venter jejonus & inanis deprehenditur, quosq; ideo sola aqua marina sustineri *ἀλευτικῶς* scriptores vari prodidere. Sed circa illos observatum animadverto, quod nullos intestinorum anfractus , sed unum modo ductum rectiorem habeant, unde alimentum, quod recipiunt, recta statim exonerant. Neque eorum intestinum semper vacuum , sed interdum cibis differtum esse con-

(a) Tom. I. Entret. XIII.

se contendunt. Ita in harengo numeratæ ultra sexaginta exiguæ squillæ gibbæ; & alio tempore venter ejus erat semiplenus ovis aliorum piscium, vel suismet ipsius, lacte genitali diffluentibus (*b*). Diversus etiam piscibus inditus est appetitus, ita ut, quod una species pro deliciis habet, id alterius naturæ contrarietur; idq; sapientissimo consilio. Si enim omnes in unum idemque alimentum ruerent, illud brevi consumeretur, & mox omnibus ex inedia mors instaret. Hinc etiam pro nutrimenti diversitate diversa organa diversaq; facultates illis largitus est Conditor. Nonnullis datam videmus fortitudinem & rapacem indolem, aliis sagacitatem, uti de pleuronechte & piscibus planis observarunt, quod se in fundo sub cœno vel arena abscondant, ut foveas illas observent, in quibus feminæ majorum piscium ova sua reponunt; quæ deinde deprædantur, iisque ipsis tanquam pretiosissimis deliciis vescuntur. Alii, qui minores & imbecilliores sunt, admiranda prædicti sunt velocitate, qua non tantum sibimet victum comparare possunt, verum etiam in qua contra vim & insidias aliorum præsidium habent. Et sic porro. Optime vero cognoscitur cuiuslibet piscis esca, dum ventriculus ejus dissecatus & partes contentæ perlustrantur. Quæ cognitio non curiosa modo est sed etiam utilis, cum inde addiscamus, qua ratione pisces in vivariis sint alendi. Cujus quidem rei Sinenes sunt optime periti, qui etiam ova piscium fœcunda affervare & longe lateque dividenda transferre norunt. Quam artem quoq; si Olao Magno fides (*c*), aliquatenus

**E** callue-

(*b*) Neocrantzius I, c. p. 28. (*c*) Olaus Magnus I, c.

calluerunt majores nostri. *Quidam, inquit, semen exenterando pisces receptum in humido loco per byemem custodiunt, ut tempore propagationis post vernalē equinoctium in aquas emittant.* Etatem piscium quod spectat, illorum multos longævos esse, tam ex tarda eorum crescentia, & variante ac admodum diversa magnitudine, quam ex variis, quæ de illis circumferuntur historiis, colligere licet.

## §. IX.

**P**orro ad utilitates etiam, quas piscium concessionem nobis dedit Conditor, considerandas animum convertere juvat; enī & ibi sufficientissima motiva ad gloriam illius exaltandam, qui non terram modo & aërem, sed etiam aquam bonis suis replevit, se exhibeant. Agnoscendi itaque nobis erunt divinæ bonitatis radii, penetrantes etiam in abyssum maris. Sunt piscium prope innumera agmina, quibus magna mortalium pars sustinetur, & unde non necessitates modo, sed etiam commoditates & delicias, habet. His enim aquarum & maris divites vivunt non tantum gentes ichthyofagæ, Cere-  
re destitutæ, quibus pisces recentes pro oblongo, siccati pro pane sunt; sed adeo savorem etiam multi pisces hominibus suppeditant escam, ut in illis quoque, qui quadragesimæ jejuniis non obligantur, ut apud ipsos saturos vel in epuli calce, famem inveniant. Hinc luxus olim præcipua pars fuit in delectu piscium, ita ut ex omnibus oblongis piscis solus *καρ' επονητής* appelletur ὕψος, & luteones φλόγες. Nonnullæ etiam piscium species ab illis, quorum Deus erat venter, nomine digni habebantur. Illa circa hos regnabat profusio, ut piscis pluris veniret quam bos, imo interdum inte-

Olympos (1) . 84. T. 1. I. 1. N. 1. gra-

gra latifundia in nulli unius pretium impenderentur. Savitas vero piscium & dulcedo in illis carnium eo magis est admiranda, cum in aquis marinis vivant, hisque falsis, amaris & nauseosis, quam amaritudinem ab illis secernere nulla ars humana potuit; artificio tamen divino in piscibus nihil saporis hujus austeri animadvertisit. Sal vero marinus, ut ipsum vastum hoc elementum a putredine conservat, ita eo insuper conductit, ut dum, quod haud raro accidit, major piscium, quam quae mox consumi potest, capitur multitudo, illa hujus medii ex ipso mari petiti ope, possit a corruptione per longum tempus immunis servari. Unde simul evenit, ut non maritimi modo, sed etiam mediterranei & orbis integri habitatores, queant marinæ hujus prædæ participes fieri, eamque sibi non divites solum, verum pauperes quoque, cum ob copiam levi plerumque pretio veneat, comparare. Sub omni tamen hac donorum suorum largitate modum quandam & mensuram servavit benignissimus Conditor, quæ ipsa est, ut novum insigne beneficium, gratissima mente agnoscenda. Ne enim in ullam natatilium speciem crudele nimis imperium exercere posset gula humana, aliquæ omni anni tempore capi non possunt, aliæ non semper sapiunt, sed interdum sunt macilentæ & intulsaæ. Et ne satietas nos caperet piscium, non omnes species simul capiuntur; sed jam hæjam aliæ in nassas & retia nostra incident, adeo ut quodlibet anni tempus singulares pelagi opes nobis offerat. Liberallissimum tamen est tempus vernale, illudque simul opportunum maxime, cum homines ab alijs negotiis ruralis

lis oeconomiæ otiosi, tum optime huic capturæ vacare possint. Illi etiam pisces, qui esui non inserviunt, aliis tamen utilitatibus sunt commendabiles. Omnes enim admirandis suis facultatibus gloriæ Creatoris exaltandæ largam suppeditant anam. Aliqui œconomiæ varias sublevant partes. Nonnulli aliis utilioribus inescandis conducunt. Sunt qui ebū, ebeno omni candidius, suppeditant. Aliorum cutis nobis utui est. Alii gluten firmissimum porrigunt. Alii oleum & adipem, plurimis usibus adhibendam. Faciunt hoc præcipue balænæ, quibus, etiam Grönlandorum œconomia fere integræ ntitur. Sed pisculum utilitates prolixius recensendas & accuratius rimandas aliis relinquimus.

## §. X.

**Q**uo enim excrecerent hæ pagellæ, si omnia, quæ de pisibus adhuc dicenda restant, attexerem, & si generalia non modo plurima de hac animalium classe hactenus omissa, exponerem, sed etiam ad specialia delcenderem; ibique lucii vorax robur, cetaceorum vastitatem, monocerotum dentes, squalorum serrata rostra, torpedinum tremorem, & horrorem inde in tangente excitatum, exocoeti alas, cyprinorum Sinensium elegantiam, aliaque his similia innumera considerarem. Esset quidem hoc, fateor, officii jam mei, cum magnaliorum divinorum in his omnibus vestigia manifestissima compareant. Sed est labor ille juveni nimis arduus, qui plurimorum virorum operam non modo requirit, sed etiam defatigare potest, Ubertate itaque & jucunditate argumenti gestientem animum, veluti vela vento secundo turgida, iam contraham. Quamvis autem plurima

rima in amplissimo hoc argumento dicenda, tam ob  
subsidiorum inopiam , quam teneriores ingenii vi-  
res, aut leviter tacta , aut plane omissa a me fint , vel  
ex illis tamen, quæ rudi exarata sunt penicillo , uni-  
cuique patescere crediderim, etiam pisces , quorum mu-  
ta conditio in proverbium verla, de infinitis tamen con-  
ditoris sui perfectionibus esse loquaces & disertos , no-  
biscq; luppeditare largissimam ansam, stupendam ejus sa-  
pientiam venerandi, immensam bonitatem & provi-  
dentiam, ea qua decet submissa animi gratitudine , ex-  
osculandi. Quis quæso tantæ erit obdurationis, ut ani-  
malia hæc contemplans , existentiam vel attributa sum-  
mi Conditoris in dubium vocare poterit? Quis ejus  
malitiæ , ut ab officio erga Deum ter optimum maxi-  
mum, cuius innumera sunt in nos homunciones benefi-  
cia, recedere impudenter audeat ? si vel cum solis pisci-  
bus maris instituerit colloquium , & audiverit  
ea, quæ hi enarrant. Job. XII: 8.

SOLI DEO GLORIA.



A MONSIEUR  
L' AUTEUR.

Le champ spacieux de la nature , nous fait voir de fort admirables marques de l' Etre tout parfait. Si le magnifique arrangement de la moindre fleur , en découvre suffisamment l' Artisan ingénieux ; combien plus donc le cabinet curieux de ce vaste univers. La sustentation perpétuelle nous fait souvenir du soin Paternel , que Dieu prend de ses creatures. Oui , Monsieur , la belle Dissertation , que Vous êtes sur le point de donner au Public , fait voir comme à l' oeil une partie de l' immense sagesse & de la prudence admirable du Créateur. Je Vous souhaite donc , Monsieur , pour digne récompense de votre industrie , non seulement ce qui ne peut Vous manquer , je veux dire , une couronne de laurier ; mais encore l' estime & l' aproba-  
tion de tous ceux , qui , comme moi prennent part à Votre prospérité. Tels sont les sentimens de celui , qui est avec sincérité

Monsieur

Votre très obéissant  
serviteur ,

ERIQUES JEAN LEVAN.